

Epeses adi letama

Pol na waikaiwama

1 ¹Taugu Pol Mamaitua na ḡoane da Yesu Keriso na apasolma. Taugu uma letanama yà girugirumina taumi tauwai sumaḡa aitaḡa Epesema ko miamiana ḡaromie. Taugu è kataie da taumi patupatutumima Yesu Kerisoe.

²Taugu aubaimima yà moimoiragina da Tamadama Mamaitua be Bada Yesu Keriso suba ta utemi be mate adi raunuatoma ḡaromie e kenana.

Mamaitua waiaiaina Kerisoe e uteutedana

³Tauda Mamaitua isanama tà kaisuḡuna. Vutuna dà Badama Yesu Keriso Tamanama. Tauda naumeki da isanama tà kaisuḡuna, baninama Mamaitua Arue mara waiaiaininama matabudi e uteutedana, baninama tauda Kerisoe aubainama. Nama tauna e voivoiana, baninama aruidama anisagunama aubainama. ⁴Boni muriḡa da Mamaitua dobu matabuna ya voiena, wainuapaḡoe ya vine dokedana da tauda sibo Mamaitua matane banaga viviviredama be nam aba wavunama te kiroḡi. ⁵Tauna boni ya vineda be tauna na ogama ya taraḡina da Yesu Kerisoe tokare ei kawa natuneda be natunatumama tà tubuḡana. Inam vutuna tauna na wainuaverema be na ḡoanama dosinama.

⁶Vutuna aubainama Mamaitua isanama tà kaisuḡusuḡuna na raukiviverema tauda ḡarode aubainama. Baninama Mamaitua Natunama Yesu nuanama taupaḡonama, be tauda Yesu ḡaroḡaronama. ⁷Be Yesu ya gurigurina, kosinine tauda ya kuvesidana be dà gewagewama ya noḡota poredina. Baninama Mamaitua na raukiviverema ya moraba kauana aubainama. ⁸Mamaitua na raukiviverree tauna nuauyauya be waikatakatai ya ḡini pore vavasaḡena tauda ḡarode da tauda sibo tè kataie da tauna aba ḡarode e voivoiena.

⁹⁻¹⁰Mamaitua na noḡotama semosemonama yai maḡataridina tauda ḡarode, baninama nama tauna na ḡoanama. Be na noḡotama

semosemonama inam umanama: Raḡankaua e tavana raḡanine, tauna tokare yaba matabuna marae be dobie Keriso na waibadama dibune e rawateḡeidina. ¹¹Tauna bonideḡo na ogama ya taraḡi be ya vinedana, da tauda Yesu Keriso Mamaitua na banagama. Nama tauna na ḡoanama. ¹²Vutuna aubainama tauda aitaḡa Keriso tēwai sumaḡa dokena, tauda sibo isanama tē kaisuḡusuḡuna, na borumama matabuna aubainama. ¹³Be yodi taumi riukaua varinama koya vaiena da Mamaitua tokare taumi ei yawasanimina. Be taumi Keriso koyawai sumaḡena raḡanine, tauna Arua Babau boni ya sausaugena ya utemina, inam na ḡipima. ¹⁴Be uma Arua Babaune tauda ya borutawadana da tokare na buderima tã paḡona. Be yodi tauda tã rabana, naumeki da Mamaitua tokare e nawedana marae, be dabudine tauna mate tã mia nonoḡana. Vutuna aubainama tauda isanama tã kaisuḡusuḡuna.

Pol ya moiragina Epeses banegidima aubaidima

¹⁵⁻¹⁶Taugu è vaiemi da taumi Bada Yesu kowai sumaḡe be Mamaitua na damma kowai nuapaḡoedina. Vutuna aubainama taugu raḡan patapatanama Mamaitua yãwai kaiwena, be yã moimoiragina taumi aubaimima. ¹⁷Be taugu yaḡoro yã moimoiragina da Mamaitua nuauyauya be katai sibo ya utemi da taumi Mamaitua sibo koya katai kauena. Tauna vutuna dã Badama Yesu Keriso na Mamaituama be Tamanama boruboruminama. ¹⁸Be mate taugu yã moimoiragina da taumi nopomima Mamaitua sibo ya rawayanana. Yodibe taumi sibo koya katai kauena da aitaḡa Mamaitua ya vinevinedina, taudi tokare yawasana vere vavasāḡinama ta banavina. Be mate taumi sibo koya katai kauena da Mamaitua na buderima boruboruminama, inam yaba dosi vavasāḡinama. Inam vutuna tauna na banagama tokare e utedina.

¹⁹Be mate taugu yã moimoiragina da taumi na rewapanama dosinama sibo koya katai kauena. Inam vutuna tauda tauwai sumaḡa ya utedana. ²⁰Uma rewapanine Mamaitua Yesu Keriso ya kawa midisuḡu munaḡe, be marae Mamaitua na kaba miane kasaunama yauwanine yai mienina. ²¹Be tauna yodi guyaguyau isa naḡonaḡodima be waibabada dosidima adi rewapanama, be rewapana ḡesaudima dobie be gunume, matabudi ya saḡa poredina, yodi raḡandie be raḡan ta veraverauna ta tavana. ²²Be Mamaitua yaba matabudi Keriso na waibadama dibune ya biridi be ya voie da Yesu ekalesia matabuna ewai badedina. ²³Baninama ekalesia matabuna inam Keriso tubuḡinama, vutuna aubainama Keriso tauna gunuma, dobu, ekalesia, be yaba matabudi nopodima ya moḡavuna.

Tauda Keriso tã yawayawanana

2 ¹Boni taumi ami rawaḡaiḡai be ami gewagewama aubainama taumi arue koya gurina. ²Inam raḡandie taumi dobu aruidima

gewegewedima adi badama Seitan koyawai muriwatanena. Inam aruinama teneḡinama yodi banaga rawarawaḡaiḡaidima ewai badedina. Be tauna vutuna wairewapaninama gunuma be dobu nopodiḡa e babababarana nam tama kitakitana. ³Noḡone tauda matabuda nama Seitan tēwai muriwatane, be dā wainua noḡonoḡotama tē voivoiedi, be tubuḡidama adi ḡoane tē miamiana. Tauda boni gewagewa nopone tē tubuḡana. Vutuna aubainama Mamaitua na medie tē miamiana. Inam kauinama teneḡinama nama, yodi banaga rawarawaḡaiḡaidima Mamaitua na medie ta miamiana.

⁴Be Mamaitua na raunuatoima dosinama aubainama tauna yai nuapaḡoedana. ⁵Tauda dā rawaḡaiḡai be dā gewagewama aubaidima tauda arue tē gurina. Be Mamaitua Keriso mate yai yawasana tenaḡedana. Tauna ya kuvesidana na raukiviverema dosinama aubainama. ⁶Tauda Yesu Keriso nopone. Vutuna aubainama Mamaitua tauda Keriso mate ya kawa midisuḡu tenaḡeda be yodi tauda marae na kaba mianama boruborumine Keriso mate tā miamiana. ⁷Mamaitua Yesu Kerisoe ewai nuapaḡoedana. Vutuna aubainama uma kauine tauna na raunuatoie yaba veredima tauda ḡarode e voivoiedina. Baninama tauna e ḡoḡoena da tokare banaga matabudi tauna na raukiviverema dosima ta kitana.

⁸⁻⁹Raḡanine taumi waisumaḡa koyawai karena, Mamaitua na raukivivere yai yawasanimina. Uma kauinama nam taumi ami noyama debane ko paḡona, ibewa. Inam Mamaitua na puyoma taumi aubaimima. Vutuna aubainama taumi nam ko seḡara yababa. ¹⁰Mamaitua tauda ya voidana. Tauda Yesu Kerisoe yai tubuḡidana da sibo noya veredima tē voidina. Inam noyedima veredima Mamaitua ya vokaukau wainonoḡidina tauda aubaidama, da sibo tē voidina.

Kerisoe tauda matabuda tenaḡa

¹¹Taumi eteni banegimima uma ko noḡoti. Taumi boni Jius banegidima awai isemina “Nam kopitom banegimi”, be taudi awai isa munaḡedina “Kopitom banegidama”. Taudi kopitom a seḡaseḡara yababena. Be nopodima kavakavanama. ¹²Ko noḡoti da inam raḡandie taumi madanie, nam Keriso diane. Taumi nam Mamaitua na damma Israel nopodie, ibewa, be mate taumi Mamaitua na saugama nam ko kataiedina. Taumi dobue nam Mamaitua ko kataiena, koya miamia nuababaḡana. ¹³Boni taumi madanie, nam Mamaitua diane. Be yodi Keriso kosinine, taumi ya verauḡemina Mamaitua diane.

¹⁴Keriso ya voie da nopodama yai subana, vutuna aubainama tauda yodi dā banagama mate tā miamia kauana. Noḡone tauma Jius banegimaima, be taumi eteni banegimima, tauda tēwai miataurina. Uma waimiataurinama inam maika gana. Inam ganinama dam rabui ya

daridariġedana. Be Keriso tubuġine inam gananama ya katiweina. Inam kauine tauda dam rabui, be yodi ya rawateġeidana da tauda inam dam tenaġa. ¹⁵Jius banegidima taudi tarawatu toitoi ġarodie, be Keriso na gurie uma tarawatudima adi waibadama yodi yai kovidina. Inam kauine boni tauda dam rabui, be yodi ya rawateġeida be tauda dam tenaġa, na subae tà miamiana. ¹⁶Yesu Keriso korosie ya gurigurina raġanine, tauda dam rabui tètwei miataurina ya kawa veredana. Tauna ya rawateġeida da tauda yodi tubuġa tenaġa. Boni tauda Mamaitua na ġaviama, be yodi Keriso ya voie da tauda Mamaitua na banagama. ¹⁷Keriso suba varinama verenama ya rauguguyena, taumi eteni banegimima ġavoe miemienimima ġaromie, be tauma Jius Mamaitua diane miemienimaima ġaromaie. ¹⁸Be yodi tauda matabuda Arua Babau teneġine tokare tà verauna Tamadama ġarone, baninama aba Yesu Keriso aubaidama ya voiena aubainama.

¹⁹Vutuna aubainama eteni banegimima taumi yodi nam wari banaga, ibewa da taumi Mamaitua na damma, mara banegimima. ²⁰Taumi Mamaitua na tempolma, be Mamaitua apasol be peroveta adi noyama debedie ya keridana. Taudi tuatua maika. Be Yesu Keriso inam maika yeku, tuatua pakanama Mamaitua e ramaramana. ²¹Taune tauwai sumaġa matabudi ya rawateġei yaġedana da Mamaitua na tempolma ya tubuġana. ²²Vutuna aubainama taumi eteni banegimima mate yodi nopomie Mamaitua na kaba miama, be Arue tauna taumi nopomie e miamiana.

Pol tauna Mamaitua na ogama yawai maġataridina

3 ¹Taugu Pol Keriso varinama è rarau guguyena ġaromie aubainama dibure a boruguna. ²Taumi agunai koya kataiena da Mamaitua na raukiviveree taugu uma noyanama ya uteguna taumi sagumima aubainama. ³Taugu uma letanama nopone kaite è riuwai nonoġimina da Mamaitua na noġotama semosemodima ġarogue yai maġataridina. ⁴Deġoda uma letanama ko sievina, taumi tokare ko kataie da riukaua taugu Keriso na noyama semosemonama è kataiena. ⁵Uma kauinama boni kimta poredima nam ti kataiena, be yodi raġandie Mamaitua Arue yai maġatarina, na apasolma babaudima be na perovetama ġarodie.

⁶Keriso na noyama semosemonama inam umanama: Deġoda banaga vari verenama tai sumaġena, avedi da taudi Jius banegidi bo eteni banegidi, taudi tokare Mamaitua na buderima ta paġona. Jius be eteni banegidima taudi noġone dam rabui be yodi taudi Kerisoe tubuġa tenaġa be Mamaitua na waiaianama ta paġona. ⁷Mamaitua na raukiviveree, na rewapanama ya uteguna da taugu vari verenama yà rarau guguyena. ⁸Taugu avedi da banaga yababa Mamaitua na damma nopodie, be tauna ya vineguna da eteni banegidima ġarodie yà rauguguyana da

taudi tokare Kerisoe, waiguyau ya moraba vavasaḡana ta paḡona. ⁹Uma kauinama boni Mamaitua na ogama semosemonama. Be yodi tauna ya vineguna da banaga matabudi ḡarodie Mamaitua na ogama matabudi yà giu waibatedina. Mamaitua tauna vutuna yaba matabuna tauvoiedima.

¹⁰Mamaitua e ḡoḡoena da Jius be eteni banegidima e rawateḡeidi, be ekalesia tenaḡa e tubuḡana. Yodibe guyaguyau be babada dosidima marae Mamaitua na nuauyuyama ta kita be ta kataiena. ¹¹Uma inam tauna na ogama boni nama kenakenanama. Be yodi Mamaitua na ogama banidima, dà Badama Yesu Kerisoe ta tubutubuḡana.

¹²Vutuna aubainama yodi Keriso tàwai sumaḡena aubainama, tauda yodi teneteneḡinama da Mamaitua ḡarone ma raudebatorada tà naḡona, be nam ma nairida. ¹³Vutuna aubainama taumi nam sibo koyai nuaboyegu yau wainuatoitoima aubainama. Ibewa da taumi sibo koyai nuaverena, baninama taugu taumi aubaimima yàwai nuatoitoina.

Pol e moimoiragina Epeses banegidima aubaidima

¹⁴Vutuna aubainama taugu raḡan matabuna tuapikague è raupari be è moimoiragina Tamadama ḡarone, ¹⁵tauna vutuna yaba matabuna marae be dobue ḡarone yawasana tà paḡopaḡona. ¹⁶Tamadama ḡarone yaba veredima toitoi. Vutuna aubainama taugu yà moiragi be Tamadama yàwai baḡana da tauna Aruine e voiemì da koi rewapanana. ¹⁷Be yàwai baḡana da Keriso ami waisumaḡe nopomie e miana, dabudine ami waisumaḡama ei rewapanana. Be mate yàwai baḡana da ami wainuapaḡoma e moraba gurata, be waramimima wainuapaḡoe e yovo guratana maika kai waraminama doḡa nopone e yovoyovona nama. ¹⁸Be mate yàwai baḡana da taumi be Mamaitua na damma, matabumi Yesu na wainuapaḡoma sibo koya katai kauena. Inam wainuapaḡonama na morabama, be na dauma, be na saḡa guratama, be na yovo guratama sibo koya katai kauena. ¹⁹Tauda banaga tokare nam teneteneḡina da Keriso na wainuapaḡoma na morabama matabuna tà katai rovodi. Be taugu yà moimoiragina da taumi Keriso na wainuapaḡoma ko katai kaue, be mayanama ko dami kauena. Yodibe taumi nopomima Mamaitua na yawasanama be na rewapanama ei moḡavuna.

²⁰Mamaitua na rewapanama nopode e noyanoyana. Vutuna aubainama aba da tàì nuanoḡonoḡotena bo tàì baḡena, tauna tokare teneteneḡinama e utedana. Be deḡoda i ḡoena, tauna tokare dosi yababinama ya utedana. ²¹Yesu Kerisoe tauda tauwai sumaḡa, Mamaitua isanama tà kaisuḡusuḡu nonoḡena. Inam riukaua!

Wairawateḡei Keriso tubuḡine

4 ¹Taugu Pol Keriso varinama è rarau guguyena aubainama dibure yà miamiana. Vutuna aubainama yodi yà riuriu vavasaḡemina da koi

beavaiegu. Ami yawasanama didimanidie ko miana, baninama Mamaitua ya vinemina aubainama, tauna na ġoane ko miana. ²Taumi ko voyaġota be ko mia nuetau. Be nam ami banagama ko nuamedi makaiedi, be wainuapaġoe nuemima ko taibagina. ³Raġan matabuna Arue koi rawateġeimi be subae ko mia tenaġana.

⁴Baninama tauda matabuda inam tubuġa tenaġa. Be Arua tenaġa matabuda nopode e miamiana. Be dā gewagewama matabudi Mamaitua ya noġota poredina aubainama, matabuda dā noġotama tenaġa, da inam raġanine tokare marae tà naġona. ⁵Bada inam tenaġa, be waisumaġa inam tenaġa, be babataito inam tenaġa. ⁶Be mate inam Mamaitua tenaġa, matabuda Tamadama. Tauna vutuna matabuda ewai badedana, tauna vutuna matabuda nopode, be taude tauna na noyama e voivoiedina. ⁷Be tauda tenatenaġaġa Keriso na ġoanama ruvane Mamaitua Arua puyonama ya utedana. ⁸Baninama girugiruminama porane umanama e riuriuna:

“Tauna note ya saġa ya naġo guratana.

Be panipani banegidima toitoi mate yai doka nawedina.

Be na banagama puyo ya utedina.”

⁹Ko noġoti da noġone ya riuna, “Tauna note ya saġa ya naġona”. Uma riunama ewai kataidana da tauna noġone note be ya yovona dobue, deġo tauda yodi tà miamiana. ¹⁰Tauna vutuna ya yovoyovona, teneġinama ya saġa ya naġo guratana mara matabudi muridie, be tauna yodi mara be dobu yai moġavudina.

¹¹Tauna vutuna ekalesia nopodie puyo tenatenaġaġa ya ute nawedina. Ġesaudima apasol, ġesaudima peroveta, ġesaudima taurauguguya, ġesaudima ekalesia taurabedima be ġesaudima tauwai katakatai. ¹²Uma banegidima taudi adi noyama da tauwai sumaġa ta sagudi, be tauwai sumaġa Mamaitua na noyama ta voiedina. Be inam kauine Keriso na ekalesiama, vutuna tauna tubuġinama, ei rewapana be e morabana, ¹³naumeki da tauda dā waisumaġe tòi rawateġeida be Mamaitua Natunama tà katai kauena. Yodibe tauda tokare Kerisoe nuadama e pora be tauda dā yawasanama, Yesu na yawasanama maika ta tubuġana.

¹⁴Yodibe tauda dā waisumaġe tà midi bagibagina, nam seda ġauġaubodima maika. Be banaga kaikaiyovudima nam ta kaiyovueda be dā waisumaġe ta kawa barabarada, waga rabama e rawarawa tagetagerina maika. ¹⁵Ibewa da Mamaitua na riukauama wainuapaġoe tòi muriwatanena. Dabudine tauda tokare Keriso tà miaratuna, tauna vutuna ekalesia debanama. Ekalesia inam Keriso tubuġinama. ¹⁶Yesu Keriso na waibadae tubuġinama raganinama e rawateġei yaġedina. Be raga tenatenaġaġa adi noyama ya utedina da ta voiena. Inam kauine raga tenatenaġaġa adi banagama mate tai kawa kaisagu be ta gogogogona. Be inam kauine Keriso tubuġinama tokare wainuapaġoe e yawasanana.

Yanae ko miana

¹⁷Bada isane taugu yà riuriuemina da nam eteni banegidima adi miane, ko mia. Taudi adi noḡotama barebaredima aubainama ¹⁸nopodima tadiwanawana ya moḡavuna. Vutuna aubainama taudi nam Mamaitua na yawasanama diane, ibewa, be taudi a bua be a kawa nopobadobadodina. ¹⁹Taudi nam vere bo gewagewa tima siesievina. Taudi gewagewa adi yawasanama matabudi ewai badedina. Taudi adi yawasanae badara dobidobi ta ḡoḡoena.

²⁰Be taumi waisumaḡa koyawai karena raḡanine, taumi koya kataiena da Keriso inam yabedima gewegewedima nam ima ḡoḡoedina. ²¹Taumi koya vaiena da Yesu varinama matabuna inam riukaua. ²²Vutuna aubainama taumi ami yawasanama poredima gewegewedima matabudi koya gosaḡana. Inam yawasanidima a gewagewa vavasḡana, vutuna aubainama a kawakawa gewegewemina. ²³Nopomima be ami noḡotama sibo Arue koya rawavaudina. ²⁴Taumi sibo yawasana vaunama koya kotena. Uma yawasaninama e voiem i da taumi riukaua babau be didimana banegimima ko tubuḡana, maika Mamaitua.

²⁵Vutuna aubainama waikaikaiyovu ko gosaḡa be riukaue ami banagama ko riuedina, baninama Yesu Keriso tubuḡine, tauda matabuda tenaḡa. ²⁶Nam ami medima e voiem i da gewagewa ko voie. Be ami medima nam nopomie e kena gurata da ravi e tava. ²⁷Nam Seitan na kaitetema ko boru.

²⁸Taumi aitaḡa taudanedanene, danene ko gose pore be nimemie ko noya gurata be yaba veredima ko voiedi da banaga waikaruwaḡewaḡedima ko sagudina. ²⁹Nam ḡasi bo waisabona mudumie e dobi. Ibewa da ami banagama anitai nuaveredima aubainama, taumi sibo mudumie giu verediḡa a dobidobina.

³⁰Be nam Arua Babau ko voie da ei nuaboya. Baninama inam tauna Bada Yesu na ḡipima ya boruna, da na kaba verauma raḡanine, taumi tokare ei yawasanimina.

³¹Vutuna aubainama uma kaudima sibo koya gose poredina: nuḡoraḡora, keamed i, meditupo, kunura, waimena be waimiatauri. ³²Ami banagama ḡarodie kivimima sibo ya verena, be nopomie raunuatoi sibo ya kenana, be ami banagama adi gewagewama sibo koya noḡota poredina. Maika nema Mamaitua ami gewagewama Yesu Kerisoe ya noḡota poredina nama.

5 ¹Taumi Mamaitua na sedama ewai nuapaḡoemina. Vutuna aubainama taumi tauna maika sibo koya tubuḡana. ²Be wainuapaḡoe sibo koya miana maika Keriso yai nuapaḡoeda, be dā gewagewama aubainama ya gurina. Be Keriso ya gurigurina, inam tipa verenama Mamaitua ḡarone ya voiena, tauda aubaidama.

³Ko kita kaua da nam banaga badabadaridima, bo gewagewa banegidi, bo waigogo banegidima nopomie ta mia. Inam kaudima gewegewedima Mamaitua na damma ḡarodie nam sibo a kena. ⁴Be taumi nam sibo uma yabedima koya voiedi: waisabona, bua giudima, bo tarakori gewegewedie koya tarakori. Inam yabedima sibo avedi, be taumi sibo raḡan matabuna Mamaitua koyawai kaiwena. ⁵Taumi uma kauinama ko katai kauena: banaga aitauga badabadaridima, bo yawasana miremiredima tauvoiedima, bo waigogo banegidima, inam nama baneginama nam na gabuma Keriso be Mamaitua adi waiguyauma nopone ima kenakenana. Waigogo banegidima inam kokoitau taurauduneedima, baninama taudi uma dobonama purepuredima ta rarau duneedina. ⁶Ko kita kaua da nam aitaugiu kaikaiyovudie e boru waideḡemi, baninama inam kaudie tokare Mamaitua na medima dosinama e yovona banaga rawarawaḡaiḡaidima ḡarodie. ⁷Vutuna aubainama inam kaudie taudi mate nam koi popo. ⁸Baninama taumi boni tadiwanawanae koya miamiana, be yodi taumi Bada na yanae ko miamiana, vutuna aubainama taumi naumeki da yana banegidima adi yawasanae nama sibo koya miana. ⁹Be yana na votama inam vere, didimana be riukaua.

¹⁰Vutuna aubainama taumi sibo koya raurubu gurata da Bada na ḡoanama yawasanidima sibo koya katai kaudina. ¹¹Be tadiwanawana na kauama nam sibo koya voiedi. Inam yabedima nam banibiribiridi, be taumi sibo banaga koyai kataidi da inam yabedima, taudi yaba gewegewedima. ¹²Inam yabedima banaga rawarawaḡaiḡaidima semoe ta voivoiedina, be giuedima yai tunimayamayaḡa kauana. ¹³Be raḡanine inam yabedima yanae ta maḡatarana, tokare banaga matabudi ta kitedi be ta kataiedi da inam yabedima matabudi gewagewa. ¹⁴Be raḡanine voia gewegewedima yanae ta maḡatarana, inam raḡanine inam voiedima gewegewedima tokare tai kavena. Vutuna aubainama banaga umanama a riuna:

“Tam gurie kenakenamma
kwa midisuḡu
be Keriso ei yanam.”

Arua na rewapanae ko miana

¹⁵Be ami yawasanae ko kita kauemi da nema ko miamia bako. Nam banaga buebuedima maika ko mia, ibewa da nuauyauya banegidima adi miane ko miana. ¹⁶Uma raḡaninama e kenakenana da Mamaitua na noyama ko voiena. Be yodi gewagewa raḡandima, vutuna aubainama ko kita kaua, da inam raḡandima veredima nam koi yakaredi. ¹⁷Vutuna aubainama nam koi taukoakoa, avedi, be Bada na ḡoanama ko kataiena. ¹⁸Nam ko tego bua be tegobuanama e voiemi da ami yawasanama e kawa gewagewa. Ibewa da Arua Babau sibo nopomima ya moḡavuna,

¹⁹be Bada riune be sare mate koi kawa duḡu vivira. Be mate sibo koyai gita be Arua saredima sibo nuemima nopone koya riḡeriḡedina Bada ḡarone. ²⁰Raḡan matabuna Tamadama Mamaitua sibo koyai kaiwena yaba matabuna aubainama dā Badama Yesu Keriso isane.

Tautauḡoma be adi waiwaivima

²¹Keriso vivirenama aubainama ami banagama ami banagama mate koi kawa vivira be ko voteyeteyedina. ²²Taumi waiwaivi ami tautauḡomama ko viviredi be ko voteyeteyedina, Bada Yesu ko vovo teyetyena maika. ²³Baninama tauḡoma tauna vutuna waivi debanama. Uma kauinama teneḡinama nama Keriso tauna ekalesia debanama. Be ekalesia tauna vutuna Keriso tubuḡinama. Be Keriso tauna vutuna ekalesia tauwai yawasaninama. ²⁴Vutuna aubainama taumi waiwaivi ami tautauḡomama ko viviredi, be ko voteyeteyedina, maika ekalesia Bada Yesu ta vovo teyetyena nama.

²⁵Taumi tautauḡoma ami waiwaivima koi nuapaḡoedina, maika Keriso ekalesia yai nuapaḡoedi be, tauname na yawasanama yai uta munaḡena. ²⁶Mamaitua riune Yesu upae^a ekalesia ya koḡedi, be ya voiedi da tauna na banagama a tubuḡana. ²⁷Tauna nama ya voiana da ekalesia kitanama e vere vavasāḡana aubainama, nam mira, bo nam pire, bo nam aba gewagewa ḡesau ḡarodie e kena. Ibewa da taudi babau. ²⁸Inam kauinama teneḡine taumi tautauḡoma sibo ami waiwaivima koyai nuapaḡoedina, maika nema taumi tubuḡimima nuenuemima e paḡopaḡona nama. Baninama deḡoda am waivima kwai nuapaḡoena, inam tamḡa kwawai nuapaḡo munaḡemna. ²⁹Nam aitu tenaḡa taunaḡa tubuḡinama ima tuatuaḡaiena. Ibewa da tauna tubuḡinama ewai kani bagibagi be e raberabe kauena, maika Keriso ekalesia ḡarone nama e voivoiana, ³⁰baninama tauda ekalesia inam Keriso tubuḡinama.

³¹Vutuna aubainama girugiruminama porane umanama ya riuna: “Tauḡoma tamanama be tinanama e gosedi be na waivima mate tai rawateḡeidi da taudi rabui inam tubuḡa tenaḡa.” ³²Inam giunama baninama ya moraba kauana. Baninama uma giunama ewai kataidana da tauda ekalesia be Keriso inam tubuḡa tenaḡa. ³³Vutuna aubainama yà riuri munaḡemina: Taumi tautauḡoma sibo ami waiwaivima koyai nuapaḡoedina, maika nema taumi tubuḡimima nuemima e paḡopaḡona nama. Be waiwaivi taumi sibo ami tautauḡomama koya viviredina.

Seda be adi dosima

6 ¹Seda taumi Keriso ḡaroḡaronama aubainama, ami dosima ko voteyeteyedina. Inam kaua verenama. ²Girugiruminama porane

^a 5.26 Uma upanama baninama inam waibabataito.

umanama ya riuna, “Tamamma be tinamma kwa viviredina!” Inam riuvavasagine, Mamaitua sauga mate ya boru dokena. ³Be sauga inam umanama, “Tam tokare uma dobune yaba matabuna garone am yawasanae e verena, be niura kai daudaunama kwa raukaisagana.”

⁴Be taumi tametamedima ami sedama nam ko voidi da ko kawa nuaboyedi bo ko kawa nuamedimedidi. Ibewa da taumi kaua veredima ko voidina Mamaitua matane be koi katakatai yagedi be Bada riune koi giunidina.

Taunoya adi babadama sibo a viviredina

⁵Taumi taunoya ami babadama uma dobune ko viviredi be ko voteyeteyedina, nuemima tabutabune maika nema Keriso ko vovo teyetyena nama. ⁶Taumi nam ami babadama anitai nuaveredima aubaidima ta kitekitemi be noḡonairidie ko noyanoya. Inam avedi, be taumi raḡan matabuna nuemima tabutabune ko noyana, Bada Yesu anitai nuaverenama aubainama. ⁷Raḡan matabuna ma nuaverem noya ko voiena, baninama inam nam banaga ḡoma aubainama koma noyanoyana, ibewa da inam Bada matane tauna aubainama ko noyanoyana. ⁸Be ko noḡoti da Bada tokare banaga tenatenaḡaḡa na noyama ruvane maesa e utena, avedi da tam taunoya bo taunoya na badama.

⁹Be mate taumi babada ami taunoyama ko rabe kuedina, be nam ko riuwai nainairidi. Baninama taumi be taunoya, taumi matabumi ami Badama tenaḡa, tauna vutuna marae e miamiana. Be tauna matane taumi matabumi inam teneḡimima.

Mamaitua iḡara taragaidima ya uteutemina ko kotedina

¹⁰Yodi yau giuma damonama inam, Bada na rewapanama dosine taumi koi rewapanana. ¹¹Mamaitua iḡara taragaidima ya uteutemina matabudi ko kotedi, be ko midi da bagibaginaḡa, yodibe Seitan na kaiyovuma gewegewedima koi ḡaviedina. ¹²Tauda uma dobune nam banaga ḡoma tamawai ḡaviedina, ibewa. Tauda arua be penama gewegewedima miamia moisiridima, vutudi tawai ḡaviedina. Taudi vutudi adi babadama, be rewapana ḡesaudima mate uma dobunama waikupikupinama tawai badena, aubainama tawai ḡaviedina.

¹³Vutuna aubainama Mamaitua iḡara taragaidima ya uteutemina, matabudi ko ragaudi da tunimie ta saḡa rovona, yodibe gewagewa e tavatavana raḡanine, taumi Seitan koi ḡaviena. Inam raḡanine taumi tokare nam ko beku, be yaḡoro ko midina. ¹⁴Vutuna aubainama ko midi da bagibaginaḡa be riukaua ko paḡo be bogemie koi boretaiena, be Mamaitua na didimanama ko paḡo da nuakademima koi rauḡaḡarina. ¹⁵Raḡan matabuna ko vokaukauana vari verenema rauguguyenama aubainama. Be banaga sibo koya riuedi da Mamaitua na subae a

miana. Uma vokaukauinama inam maika ami kaḡasumama ko vovo kaukauedina, naḡo aubainama. ¹⁶Be mate waisumaḡa ko paḡo da ami guduma, aniwai rauḡaḡarimima aubainama. Inam gudune taumi tokare Seitan na keama menarageraḡetinama e veraverauna ko kati gabana. ¹⁷Be ami yawasanama Bada ya uteutemina koi kunuboboe. Be Mamaitua riunama ko paḡona, inam vutuna Arua Babau na iḡarama kwatikwatinama. ¹⁸Be raḡan matabuna Arua Babau ko moiragina, be ami ḡoanama na ruvae Mamaitua ḡarone sagu koi baḡena. Raḡan matabuna koi neneḡanana ami moiragie, tauwai sumaḡa matabudi aubaidima.

¹⁹Be taugu mate aubaiguma ko moiragi da ma raudebatoragu vari verenama waimoisirinama ya rauguguyena. ²⁰Taugu yodi a panigu da dibure ya miamiana, be ko moiragina aubaiguma da taugu yaḡoro ma raudebatoragu vari verenama ya rauguguyena. Inam taugu yau noyama.

Pol na waikaiwama

²¹Taugu Taikikas è riuporena ḡaromie. Tauna banaga patupatutunama Bada matane, be mate nuaguma taupaḡonama. Taugu nema ya miamia bakona, tauna tokare yaba matabuna ei varimina. ²²Vutuna aubainama taugu è riuporena ḡaromie da nema ya miamia bakona sibo yai varimi da koya kataiena, be mate tauna e duḡumina.

²³Taugu Tamadama Mamaitua be da Badama Yesu Keriso yaḡwai baḡedina da suba, wainuapaḡo be waisumaḡa sibo a utemina. ²⁴Be mate adi raukiviverema taumi aitaḡa Yesu Keriso kowai nuapaḡo nonoḡena sibo a utemina. Uma yau giurma damonama.